

PARLAMENTARNA SKUPŠTINA BOSNE I HERCEGOVINE

78

Na osnovu člana IV.4.a) Ustava Bosne i Hercegovine, Parlamentarna skupština Bosne i Hercegovine na sjednici Doma naroda održanoj 7. marta 2002. godine i sjednici Predstavničkog doma održanoj 17. aprila 2002. godine, usvojila je

ZAKON

O OSNIVANJU INSTITUTA ZA AKREDITIRANJE BOSNE I HERCEGOVINE

I - OSNOVNE ODREDBE

Član 1.

Ovim zakonom osniva se kao samostalna institucija Institut za akreditiranje Bosne i Hercegovine (u daljem tekstu: BATA) kao organ državne uprave za provođenje Sistema akreditiranja Bosne i Hercegovine, uređuje njegov položaj, nadležnost ovlaštenja kao i druga pitanja od značaja za organizaciju, funkcioniranje i rad BATA-e.

Član 2.

1. BATA obavlja, u okviru djelokruga utvrđenog zakonom, upravne i druge stručne poslove u okviru prava i dužnosti države Bosne i Hercegovine, ako ti poslovi nisu povjereni drugim državnim organima, odnosno ako nisu zakonom povjereni drugim organizacijama i zajednicama.
2. BATA provodi nadzor nad izvršavanjem zakona i drugih propisa iz svoje nadležnosti na teritoriji države Bosne i Hercegovine, ako drugim propisom nije drukčije uređeno.
3. Bosna i Hercegovina putem BATA-e ostvaruje saradnju sa odgovarajućim evropskim i međunarodnim institucijama te sa sličnim nacionalnim institucijama. Saradnja sa evropskim i međunarodnim institucijama se obavlja putem članstva.

Član 3.

1. BATA ima svojstvo pravne osobe.
2. Sjedište BATA-e je u Sarajevu.
3. Pravilnikom o unutrašnjoj organizaciji BATA-e osnovat će se njegove ispostave u oba entiteta koje će obavljati sljedeće poslove:
 - a) pružanje informacija krajnjim korisnicima o Sistemu akreditiranja Bosne i Hercegovine;
 - b) promoviranje mesta i uloge akreditiranja u sistemima ocjenjivanja usklađenosti;
 - c) prikupljanje podataka o stručnjacima u entitetu za pojedina područja akreditiranja u cilju njihove dalje edukacije i osposobljavanja za rad u Sistemu akreditiranja Bosne i Hercegovine;

d) učešće u organizovanju seminara iz područja akreditiranja za zainteresovane podnosioce zahtjeva za akreditaciju;

e) prikupljanje informacija od trećih strana o radu akreditovanih tijela u entitetu.

Član 4.

BATA osigurava jednak položaj svim strankama u skladu sa zakonom.

Član 5.

1. BATA ima pečat, koji je izrađen u skladu sa propisima Bosne i Hercegovine.
2. Na zgradi u kojoj je smješten BATA, mora biti istaknut naziv BATA-e i državni grb.
3. Naziv BATA mora biti ispisan na bosanskom, hrvatskom i srpskom jeziku, na latiničnom i ciriličnom pismu.

Član 6.

1. U BATA-i su u ravnopravnoj upotrebi jezici koji su u službenoj upotrebi u Bosni i Hercegovini.
2. U postupku pred BATA mogu se koristiti i drugi jezici koji nisu u službenoj upotrebi.

II - NADLEŽNOST BATA-e

Član 7.

1. BATA je nadležan da:

a) U području akreditiranja:

Razvija, provodi i održava Sistem akreditiranja Bosne i Hercegovine, provodi proceduru akreditiranja i nadzora tijela za ocjenjivanje usklađenosti, zastupa Bosnu i Hercegovinu u evropskim i međunarodnim organizacijama za akreditiranje, organizuje i provodi specijalističko obrazovanje kadrova u području akreditiranja, te razvija i uspostavlja informacioni sistem o dodjeljenim akreditacijama te o dokumentima iz područja akreditiranja.

b) Obavlja i druge upravne i stručne poslove u okviru svoje nadležnosti.

III - UNUTRAŠNJA ORGANIZACIJA

Član 8.

1. Unutrašnja organizacija BATA-e uređuje se pravilnikom o unutrašnjoj organizaciji BATA-e koji donosi direktor BATA-e uz saglasnost Vijeća ministara Bosne i Hercegovine.
2. Direktor BATA-e pravilnikom o unutrašnjoj organizaciji BATA-e utvrđuje njegovu organizacionu strukturu i djelokrug rada pojedinih njegovih dijelova.

IV - OVLAŠTENJA, OBAVEZE I ODGOVORNOST DIREKTORA BATA-e I OSTALIH RUKOVODEĆIH SLUŽBENIKA

Član 9.

1. BATA-om rukovodi direktor BATA-e.
2. Direktor BATA-e:
 - a) predstavlja i zastupa BATA;
 - b) organizuje i osigurava zakonito i efikasno obavljanje poslova;
 - c) donosi propise kada je za to zakonom Bosne i Hercegovine ovlašten;
 - d) izdaje druge akte za koje je ovlašten;
 - e) preduzima druge mjere iz nadležnosti BATA-e;
 - f) odlučuje u skladu sa zakonom Bosne i Hercegovine o pravima, obavezama i odgovornostima službenika u vršenju službe;
 - g) odgovoran je za razvoj i provođenje politika BATA-e te za nadzor, djelovanje i rukovođenje svakodnevnim poslovima BATA-e;
 - h) osigurava da su politike BATA-e u skladu sa onim koje su date u odgovarajućim međunarodnim standardima i smjernicama za rad tijela za akreditiranje;
 - i) donosi tarifu o visini naknade za usluge koje BATA pruža trećim licima.

3. Direktora BATA-e imenuje se i razrješava u skladu sa zakonom.

Član 10.

1. Direktor BATA-e ima jednog zamjenika koji ga zamjenjuje ukoliko on nije u mogućnosti obavljati svoja ovlaštenja.
2. Direktor i zamjenik direktora Instituta za akreditiranje će biti imenovani od Vijeća ministara Bosne i Hercegovine i bit će iz različitih entiteta ukoliko nije drukčije propisano zakonom.
3. Pravilnikom o unutrašnjoj organizaciji BATA-e utvrđuju se radna mjesta rukovodećih službenika, poslovi koje oni obavljaju i njihove nadležnosti u vršenju službe.

V - SREDSTVA ZA FINANSIRANJE BATA-e

Član 11.

1. Sredstva za rad BATA-e, uključujući i njegove ispostave, utvrđuje Parlamentarna skupština Bosne i Hercegovine na prijedlog Vijeća ministara Bosne i Hercegovine.
2. Sredstva za rad BATA-e i njegovih ispostava čine: sredstva za plaće, sredstva za materijalne troškove, sredstva opreme, sredstva za razvoj Sistema akreditiranja Bosne i Hercegovine i sredstva za posebne namjene.
3. BATA se finansira iz sredstava:
 - a) ostvarenih davanjem usluga iz svoje djelatnosti;
 - b) participacijom iz budžeta Bosne i Hercegovine.

4. Sredstva iz budžeta Bosne i Hercegovine obezbjeđuju se u skladu sa Zakonom o budžetu i Zakonom o izvršenju budžeta.

Član 12.

Direktor BATA-e je naredbodavac za pripremu predračuna budžetskih sredstava i izvršenje finansijskog plana BATA-e.

VI - PRELAZNE I ZAVRŠNE ODREDBE

Član 13.

1. Danom stupanja na snagu ovog zakona prestaje sa radom Sektor za akreditiranje pri Zavodu za standardizaciju, mjeriteljstvo i patente Bosne i Hercegovine koji je osnovan Zakonom o upravi i upravnim organizacijama Bosne i Hercegovine ("Službeni list RBiH", broj 17/96).

2. Poslove Sektora za akreditiranje iz stava 1. preuzima BATA, preuzima i raspoređuje službenike koji su na dan stupanja ovog zakona zatečeni na preuzetim poslovima.

Član 14.

1. Osnivač, odnosno organ koji utvrđuje sredstava naveden u članu 11. stav 1. ovog zakona, će obezbijediti BATA-i potrebne prostore, materijalna sredstva i opremu za njegov rad u skladu sa aktuelnim potrebama i planiranim razvojem Sistema akreditiranja u Bosni i Hercegovini.

2. Dio opreme i materijalnih sredstava iz stava 1. pomenuti osnivač će osigurati kroz prenos u vlasništvo BATA-e materijalnih sredstva i opreme Zavoda za standardizaciju, mjeriteljstvo i patente Bosne i Hercegovine koja su bila namijenjena obavljanju zadataka u području akreditiranja.

3. U cilju racionalizacije kadrovske i materijalne sredstava, u periodu od dvije godine od donošenja ovog zakona BATA i Institut za standarde, mjeriteljstvo i intelektualno vlasništvo Bosne i Hercegovine formirat će zajedničke službe za opće i pravne poslove, finansijske poslove i informativno-izdavačku djelatnost. Organizacija i rad ovih službi bit će riješeni na jedinstven način u pravilnicima o unutrašnjoj organizaciji obje ove institucije.

Član 15.

1. Direktor BATA-e donijet će, u roku od 60 dana, od dana stupanja na snagu ovog zakona, pravilnik o unutrašnjoj organizaciji.

2. Raspoređivanje službenika u BATA na odgovarajuće poslove i zadatke izvršit će se u skladu sa pravilnikom iz stava 1. ovog zakona.

Član 16.

1. Radno mjesto pomoćnika direktora za akreditiranje Zavoda za standardizaciju, mjeriteljstvo i patente Bosne i Hercegovine stavlja se na raspolaganje nadležnim organima danom stupanja na snagu ovog zakona.

2. Pomoćnik direktora za akreditiranje Zavoda za standardizaciju, mjeriteljstvo i patente Bosne i Hercegovine i drugi rukovodni radnici Sektora za akreditiranje obavljaju svoje nadležnosti dok prema redovnoj i zakonskoj proceduri ne budu ponovo izabrani ili zamijenjeni.

3. Prava rukovodnih radnika čija radna mjesta su stavljeni na raspolaganje nadležnim organima, rješavaju se u skladu sa zakonom i Pravilnikom o radnim odnosima Zavoda za standardizaciju, mjeriteljstvo i patente Bosne i Hercegovine.

Član 17.

1. Ovaj zakon stupa na snagu osmog dana od dana objavljivanja u "Službenom glasniku BiH", a objavit će se i u službenim glasilima entiteta.

PS BiH broj 45/02 17. aprila 2002. godine Sarajevo

Predsjedavajući Predstavničkog doma Parlamentarne skupštine dr.Željko Mirjanić, s.r.

Predsjedavajući Doma naroda Parlamentarne skupštine BiH Sejfudin Tokić, s. r.